

ukuba umpéfumlo waké kaloku uvatisiwe ngesivató esimhlopé ebusweni besihlalo sika Yehova.

“Mabati bonke abantu base ma-Xoseni bafunde, bazekele ku-Ntsikana ukulinyamekela ilizwi lika Tixo.

“U-Ntsikana waliva ilizwi lika Tixo ngabafundisi, waza wazi bamba wazigcina ezonto awaye zifundisiwe ngabo.

“Kodwa-ke masingabi u-Ntsikana waye ngumprofeti obexelelwa izinto ngu-Tixo. Masazi ukuba likwaleli lizwi lika Tixo libáliweyo elité akuliva ngabafundisi, lasikelelwa ngu Tixo, lawukanyisela umpéfumlo waké kakúlu: likwaleli sisenalo nati. Yena weva intwana encinane, waza wati lontwana wayigcina wayikumbulela, waza wanokwazi. Ubuninzi benu ma-Xosa buliva futi elozwi lixelwa ngaba fundisi, kadwa ke noko nilivayo futi anibi zizo izicaka zika Kristu nixelise u-Ntsikana lowo simvayo. Yazini ukuba nisenjenjalo nje, imikwa ka-Ntsikana yoze inigwebe. Kulumkeleni ukuliva kwenu ilizwi, nilive ngenyaniso. Mfuneni u-Yehova lomzuzu asafumanekayo.

“Zixonxeni ngokwenu ukwamkela ilizwi lika Tixo, ukuze nidumise u-Tixo elizweni, kuti ukufa kwenu kube kokwa malunga. Qondani ukuba elotámsanqa anisayi kulizuzana nakanye ukuba niyaligxeka ilizwi lika Tixo.

IMBALI YOKUFIKA KWELIZWI KWA-XOSA.

[JOHN MUIR VIMBE.]

[Eli pepa lilandelayo bunqina buka John Muir Vimbe, utanga ka - Dukwana, owati emva kokugqoboka wasinikela ebushumayelini, eqala kwelase ma-Xoseni kwada kwase Natal. Wabúba engapezu kwama 80 iminyaka. Lencwadi yashicilelwa kwi “Sigidimi sama-Xosa,” May, 1888.

—J. K. B.]

NDIVUYISWA lixsha lokuvela kwam kwelilizwe, uté u-Mnini-nto-zonke ukundibumba kwaké wandibumba ngexesha lokutúmela kwaké ilizwi laké ezweni lakowetú. Ekute ke ekufikeni kwalo nabafundisi, aza amakósi etú abamkela. Nditi ke ukuzibalisela izihlobo zam. Kwafika umfundisi ndiyinkwenkwana; bekuté ngapámbi kokufika komfundisi lowo kwavuka u-Nxele, umfo ka



John Muir Vime, one of Ntsikana's Contemporaries.

Balala, no-Ntsikana umfo ka Gaba. Kwabe kukuqalu kokubona kwam Ilizwi. Ndiyifunela kuleminyaka, imi nyaka yobupolofiti balomadoda, kulo we 1814 nakowe 1815. Umfundisi lowo bendité wafika, ndingati wafika ngalonyaka we 1816, ukuba andipósisí. Wafika waká kwa Sihota, igama laké bekutiwa ngama-Xosa ngu-SODYOYI. Emva kwaké kwafika u-Rev. Mr. Brownlee, ngalonyaka we 1820, ukuba andipósisí.

Mandingene ekuqaleni kokuliva kwam elilizwi lika Ndingokóyo. Kwafika u-Ntsikana evela e-Gqora, wafika waká kwa-Mankazana, owakowetú umzi use Jadu, umfula ongena kwa Mankazana. Wabe esiti u-Ma, kwakufika i-Sabatá, ahambe nam ukuya etyalikeni kwa Ntsikana. Ityalike yakóna yayisenzelwa ngapántsi komqoncl, izitulo ingamatye. Ekuziboneni kwam sasingati sintanganye no-Dukwana. U-Kobe emkúlu kunati. Ndandilivela ebudengeni elilizwi lo-Menzi wetú ngeloxesha. Akahlalanga kakúlu u-Ntsikana kwa-Mankazana. Kwati ngalonyaka we 1824 ekupéleni kwawo wesuka u-bawo no-Nxé* beza esikolweni sase Gwali; sangena ku-*Matshaya*. Ama-Ntsikana ese wonke; epétwe ngu Palaza, Hogu, Xelewa, Rwexana, Mazaleni, Noyi, Matshaya, Peyi, Liginye, Mtyobile, Nginya, Tamo, Velem, Qalaka. Aye epétwé yinto ka-Ntsikana u-Kobe, indoda elunge kakúlu ngemvelo, pézu kokuba bebencóle kangaka abantu abatsha beso sikolo ngenko-hlakalo yabo.

Afika ama-Ntsikana e-Gwali u-Mr. Brownlee epáhlwe ngama Lawo akwa Sihota. Eso sikolo sase Gwali sasikubizwa kubini, kutiwa elinye icala lomzi kuse Ma-Gwangqeni, kutiwa elinye lelama Ntsikana.

Iziyalo ezikúlu ebendiziva kulo makolwa eloxesha zizo ezi: Ayesiti ukwaluka sisono, nokulobolisa, nokududa, nozitumbu. Savela ke nati sangena kwakulo ndlela, sati ke zonke ezizinto ziyimivuyo sazibiza ngokuti zizizono. Ati okólwe esemtsa elizwini, ati akukangela ekutshileni kwaba kwéta, nokuba kusemdudweni kuze kube yinto enkulu leyo, aze abe yinto yokukutshwa nase

* *Lo-Nxé nguyise-mkulu ka John Knox Bokwe ngonina, nowafela elukolweni esiquke ku Ntsikana. Nguye obemama ebalivela umzukufwana ngo-Ntsikana eli numhla alishicilelwe.*

rementeni. Ndisababeka ngapandle abafundisi abamhlopé kwezi zinto. Nam ke ndingomnye wabebesitsho ukuti ezizinto zikukona, sisitsho singabuzanga nase lizwini le-Nkosi, u-Ndingokóyo, ohleli ekó kwizizukulwana ngezizukulwana.


Ndinemivuyo emikúlu kwanemibulelo emikúlu ngokugcinwa kwam ngu-Menzi wento zonke, ondigcine ndada ndakubona nokuguqulwa kwe-Lizwi lake lonke ngentetó yetú. Elilizwi lifike naba Fundisi. Lifike sinemitétó yetú eyahlukanisiweyo kweminye, eti umntu akuyapúla abe netyala. Ingaziwa mntu ukuqaleka kwayo. Elilizwi lika Ndingokóyo elafika naba Fundisi, ekuliguguleni kwabo ngentetó yetu, lifike lati kwezizinto esiti zikukona, lafika nalo lati zonke ezizinto zikukona, ozenzayo unetyala lokuba asiwe emlilweni: ezinje ngobusela, nokurexeza, nokubulala, nobuxoki, namanye amanyala akule ncwadi ye-Levitikusi xviii. 6-30, izinto ezingapandle kokwaluka, nokududa, nokulobola. Ezizinto esité tina zikukona lingatsho pofu ilizwi lika Menzi. Utsho u-Msindisi ukuti imisebenzi ka-Yise ihamba eku-kányeni.

AMABALANA ANGO-NTSIKANA:

I.—NGU-ZAZE SOGA.

U-ZAZE SOGA, umbalisi walamanqaku ngunyan' omkúlu kwindlu yase kunene ku Soga Jotelo, ngumfo wasema Jwareni. Wazalelwa e-Gwali, e-Tyume. Bantanganye nomfi u-Rev. Tiyo Soga kwa nomfi u-Rev. Richard Ross. Wazalwa nge 1830, ngapambili kancinane kwi Mfazwe ka Hintsa, 1835, kwiminyaka elishumi efile u-Ntsikana. Esusela ku yise u-Soga, owayebuse ku Ngqika, wayelipakati u-Zaze ku Sandile.

Uti:—"Nanku endikwaziyo mna ngo Ntsikana. U-Ntsikana wayengumfo ka-Gaba, enguyise wo-Kobe no Dukwana aba. Ndilazi ibali lake ngokuliva ngo bawo u-Soga, ongasekoyo; nowabegqobokile ngendlela yake yalomaxesha asebumnyameni—egqoboke ku Ntsikana. Apo, pofu mna ndazalwa xa sise Gwali paya nge 1830 esandul' ukububa yena u-Ntsikana nge 1821. Noko ke kunjalo ibali lake lona ndilaze lise shushu. Ndiwabo-



Chief Sandile, head of the Gaika Clans.

ne ngokwam namagqoboka ake okuqala. Ndiwazi nangama-gama; ndaza nam lo ndalutátisela kwalapo uluvo lokuba ndicinge ngo-Tixo umdali wam endifanelwe kukuti ndimkonze.

“U-Ntsikana wavelela kwa Ndlambe ukucaca ngobu profeti bake (naxa ke kodwa yayise imhlile lento yake esekwa Ngqika kowabo.) Lalilixesha lika Nxele, igogo lakwa Ndlambe, elaliteta kakulu izanga namampunge angazange apumelele ntweni kude kube namhlanj’oku. Apate kuti uyakwenza izulu liwuwele umkosi wabelungu xa kuliwayo ngase Rini paya. Ute ke u-Ntsikana, ebeye kwa Ndlambe apo, kupulapula ezinteto zika Nxele kwa Ndlambe, waman’ebukolelwa kuzo, wada wamfuma no Nxele lowo ngenkab’ enkomo emhlope; njengoko u-Nxele ebesel’emiseleke ukuba afunywe ngumntu wonke. Koko ke kodwa lenkomo yabuya yaputunywa ngu Ntsikana ngokuti kanti uxokisiwe naye njengabany’abantu abatyólileyo u-Nxele ngobubuxoki bake bokuti abe Lungu uyakubawisela ngezulu xa kuliwayo ngase Rini paya. Njengokuba yayise inxwalene, esiti ama Xosa akakulwa ngazikali kona, ayakulwa ngokuwisela ama Ngesi ngezulu. U-Ntsikana wampikisa esiti “Nento” kanti ke okunene amatyipkolo (Cape Corps) ayakusuka abagqibe abantu aba ukubadubula. Kute kwakuba lapo, akwenjenje ukucásana amadoda atatayo—u-Ntsikana no-Nxele, lati elakomkulu lika Ndlambe ukuyilamla:—‘U-Ntsikana lo makak’ eme sisapulapula le into, indlebe zobeta-betana, unanina angak’abe ngaku Ngqika paya’! Kumhla ke lomini u-Ntsikana wabuyela kowabo kwa Ngqika ukuza ’kuteta kona esiti:—‘Namp’ abantu bexokiswa ngu Nxele kwa Ndlambe; kanti mna le yam into ayitsho.’

“U-Ngqika utume u-Soga ukuba aye kupulapula u-Ntsikana. Wabuya u-Soga ekoliwe nzulu ngu-Ntsikana, nobunyaniso benteto ka Ntsikana wabuqúba njengoko enkosini yake emtumileyo. Suka kanti lento seyinzulu kulomfo wasema Jwaŕeni. Ubelelinye lamapakati ka Ngqika. Suka umntu wagqoboka, waligqoboka eliliko-lwa lika Ntsikana elimana ukushumayela lento emzin’

alo paya, ologqoboko pofu lwalomaxesha lwalungumfiliba apa osinga entweni pofu. Amanyange lawo aqal' amqonda u-Tixo njengom-Dali owadala zonk' izinto, nezinambuzane, kwanentaka ezibukekayo nezintle emehlweni. Bebesiti ke ukutandaza kwabo zonk' izintw' ezintle zibe zezika Tixo; 'ze ezimbi zonke ibe zezika Satana. Kutiwe ukutandazwa 'Wena Tixo osemazulwini, Nzwan' enkulu, owadala intaka nezilo:' ezitile nezitile, kubalwe ezintle zodwa.—' Ongafani no Satana owati akufuna ukudala intaka suka qapu wenza ilulwane, nesikova!' Lwalunjalo ke ubufiliba logqoboko lwalomaxesha abo asebumnyameni 'entwana ezincinane.' Inkosi u-Ngqika akuvana ebenezi zibongo ziti-nje ngo Soga: 'Lututwana lwendlu yomshologu?' kuba kaloku u-Soga wayak' umnquba wentendelezwana yokubédeshela; waza kuba ebeselisoka ukuyiqala kwake lento, inkosi u-Ngqika, yakupa inkomo zokuze u-Soga alinyelwe intsimi ngazo.

"U-Ntsikana lo beno Soga mababe babengamazana nabamelwane kwangapambili. Babe zizihlobo kuba nanku u-Ntsikana wabezeke um-Jwatakazi, unina wo Dukwana no dade wabo. Lonto ikwaqondakala ngokuti u-Ntsikana akubuzwa ngu-Ngqika umntu azana naye kweso sakwaké apendule ngokuti ngu Soga umntu endimaziyo, aselesiti ke no-Ngqika kuye 'Yiya ku Soga ke akukangelele indaw' okuhlala.' Eyile-ke ku Soga, u-Soza waya wambeka e-Twátwá, kwa Mankazana, kwindawo apa bati li Jadu ngegama, uteke elapo u-Ntsikana walihamba lonke elakwa Ngqika, ati ekomkulu abe epi, eshumayela lenguquko kumawabo akwa Ngqika; waye lomntu ehlonelwe kuba ingumntan' okuzalwa, ekwalipakati kwamany' amapakati. Ubeshumayela esiti—'Iti lento makutandazwe zilahlwe ezizono.' Atsho azibale ke yena izono namanyondo-nyondo abeqútywa oko entlalweni yasema-Xoseni. Ubeshumayela esalata—"Ulo Tixo Mkulu Ngosezulwini."

"Ngumfo owabeta ngeqela leremente entsha ncbukáli kunene emicimbini nasemsebenzini we Lizwi lika-Tixo. Umntu wokuqala ukuguquka kule ntshumayelo ka

Ntsikana ngu Ngqika ngokwake. Ute mhla walivuma lomfo ka Mlawu:—'Ukuze kulunge makuqale mna lo kanye ukungena kulento.' Watsho wasel' efudukela kumzana wake obuse Nceŕa paya kufupi nenxowa le Simnari yabafundisi. Kodwa ke suk' avuka pantsi amapakati ake, ema ngenyawo emnqanda kulento; abeta wabalekela emahlatini ngokuzinqabisa nalento yake, etandaza eyedwa nje ezindle paya. Suka ke ekugqibeleni, lamapakati atanda kunene ubumnyama, amlahlekisa mpela u-Ngqika, wabeta wahlukana nalontlantsi yokukanya wabeyizuze kulowo ka Gaba etunyelwe ukuprofeta kwelakowabo lisesitokotokweni.

"Kodwa ke noko oku kwenza akalitintelanga Ilizwi elalikutshelwe umprofeti wokulihambisa; koko lasuka lona lazizuzela abalo ematyeni. Kumagqoboka okuqala ka Ntsikana ndipaula o-Noyi, Matshaya, Mbi, Tamo, Xuba, Koti, Matshikwe, Kobe, Dukwana, Sutu Soga nama-Jwaŕa akwa Soga, o-Festile, nabanye angenelela. Esi-ke mlesi yaba siqalo se-Bandla lika-Tixo ka Ntsikana. Saseka ama-Bandla amakulu nangqindilili ema-Bofolo, kwa Mankazana, nakwa Somerset e-Mkubiso, ema Debe, Qonce, Ncemeŕa, Emgwali ka Ngqika, nase Transkei. Kwezindawo wofika libanzi igama eliti—'Siyiremente yase Gwali tina,' esiti umntu—'Ndaliva kwaku Ntsikana,' . . . 'kwase Tyume,' njalo-njalo. Yiremente eyayino Moya ka Tixo, ivuma, itumekelela, ikalipile; okanye yay'isulungekile entlalweni nasebu-Kristwini bayo. Nalamabandla siwabonayo namhlanje kungatshiwo kufaneleke nokutiwa 'Yinzala yeremente ka Ntsikana,' oyena mseki wokuqala wobu Rabe kweli lasema-Xoseni. Nabafundisi abamhlope bokuqala bangenelela eqalweni lomsebenzi ka Ntsikana.

"Abantu bokuqala ekugqobokeni ku Ntsikana, njenge mfanelo, yaba ngama Cirha nama Jwaŕa; nakubeni abekoyo wona amangqandendana ama Kwayi nama Gwali nama Ntakende nezinye izizwe; kanti ke noko wona umqumbi yayingama Cirha nama Jwaŕa. Ama-Jwaŕa, kaloku—lomzi ka Konwana,—wawuhlatyelwe lento ka Ntsikana kwayinqu ka Ntsikana ukuze nje bayi

ngene; yilento litshoyo iculo lika Ntsikana ukuti—
‘Lomzi ka Konwana siwubizile,’ Kutyledede abashicileli
ukusuke bati ‘Lomzi wakonana siwubizile.’

“Bate bakufika abafundisi bokuqala abamhlope ba-
nqwenela ukuba bampehlelele u Ntsikana; kodwa ke
yena akavumanga. Ubapendule ngeliti ‘Hayi, oku
ndikuko kundanele,’ bamncam. Kodwa ke amagqo-
boka amaninzi ake apehlelelwa ngabafundisi, ukuze-nje
u-Noyi, uyise ka-Makapela, atabate igama elingu
‘Balfour.’

“U-Ntsikana ngumfo owab’ enokuteta okwalata okuse-
zayo, ukuzalisekisa unyulo lwake lobuprofeti kowabo
ema-Xoseni, wateta kakulu ngentlanga ezimbini ezizayo
olunye luvela ngasentshonalanga ama Ngesi; nolunye
luvela ngase Mpumalanga—ama Mfengu.

Wenjenje ngabe Lungu:—

‘Luyeza uhlanga olumhlope, olunwele zifana nobu-
lembu bombona obu, luza lupete iqosha elingenamlomo
(imali). Lungumpambanisi; zenililumkele eliqosha. Lu-
pete ne Zwi lika Tixo; ze nilipulapule, nilamkele ke
lona. Ukuba anilipulapulanga, izwe lenu liya kuzala
zindlela zinqwelo, zintango zengcingo, nayimihlambi
yegusha. Ningaze nilwe nalo, wena Ngqika; u-Nxele
lo uyaxoka; uyabalahlekis’ abantu.’

Nga Bambo ute:

“Luyeza uhlanga olundlebe zimabèkebèke njenge-
ngqoto zesikumba; zeningalucukumisi, nemikwa yalo
niyinxweme, ningayingeni. Lwakumka lwenjenjeya;
zelube lubuyele kwalapo lwaluvele kona.’ Utsho wati,
‘Zeniqonde ke ayakubako amanqina okundinginela
abe maninzi epuma kwasenzaleni yenu apa.’

“Lomfo walekela ngezinye inteto wati ‘Ndibona mna
ukuba liyeza ixesha uhlanga luyakusuka pezu kohlanga,
uyise angavani nonyana, intombi ipambane nonina, kude
kufike u-Sifuba-sibanzi owonibuyisela kwakula Ntaba ka
Ndoda.’

“Lomntu ke eteta ezinto nje ngumntu ufana nomntu
wonke, unesitembu sabafazi ababini, omkulu nowase
kunene. Onyana bake babe babini qâ ingu Kobe omkulu

no Dukwana owase kunene. Unina ka Kobe wayengum-Qocwakazi, u Nontsonta igama, unina ka Dukwana ingum-Jwafakazi; ogama lingu Nomkini.

“Konke ukuteta kuka Ntsikana kuzalisekile ngendlela zonke. Akufananga nokuka Nxele okusajongiweyo nanamhlanj’oku; kwabeta kwavela eliqalo liti ‘Kukuza kuka Nxele’ xa sukuba into le ingasokuza ide ibento ikoyo.

“U-Ntsikana wasweleka nge 1821 kukugulana kwake okutambileyo okwamtata ixesha elitile. Lento ke icaciswa kukuba ete egula nje wenza waxdlwa umkumbi wake womhlunguti, emana ezilinganisela ukuze angaxingi kuwo. Lomkumbi wake wade wagqitywa esapilile yena, ukuze ancwatywe ngawo akuba ede wasweleka. Oku kukuti ke u-Ntsikana akanelanga kuba ngum Kristu nomprofeti wokuqala apa ema-Xoseni; koko waba ngumntu wokuqala ukuncwatywa ngomkumbi ngokwesiko lasesikolweni. Incwaba lake nalo e-Twátwá, kwa-Mankazana.

“Wati u-Ntsikana ukuyolela kwake, pambi kokuba abúbé ese Twátwá apo, wabiza umhlobo wake, u-Soga umfo ka Jotelo, wateta kuye esiti:—‘Ndikubizela lento: Fudusa olusapo lwam luno Kobe no Dukwana nabafazi bam bobabini, uye nalo e-Gwali paya e-Sikolweni, uyo kulugcina luhlale kuwe. Ukuze nje olusapo lwasema Cirheni lube se Gwali e Sikolweni paya. Okukuti esi kolweni nditsho ngokuba umfundisi wokuqala ku Ngqika u-Nyengana (Dr. Vanderkemp) wayebekwe esandleni sika Soga ngokunikelwa ngu Ngqika.

“Akubúbá u-Ntsikana okunene u-Soga uye walufudusa olusapo lwama Cirha, elufudusela kuye e-Gwali ngokomyolelo womfi umporofeti u-Ntsikana Gaba.”

Lipel’ apo ke Iballi lika-Ntsikana ngumbalisi ongu-ZAZE SOGA.

II.—NGU-MAKAPELA NOYI BALFOUR.

U-MAKAPELA BALFOUR, ogama lakowabo lingu Sangani, wasema-Kwayini, ngunyana omkulu ka NOYI. Waye lelona nyange kumadoda amakulu esasinawo ukulibalisa kwake ngo 1910. Wazalelwa kwa Mankazana,

mhla u-Ngqika waya kudla u-Matika efika evela ku-Mshweshwe. Yintanga ka Nongobo intombi yamazibulo ka Soga. Ngemfazwe yama Linde (1818), ekwalwa u-Ngqika no Ndlambe, wayeseleyi nkwenkwe enkulu. Abanye abantu abafela kulomfazwe usabazi nana-mhlanje. Uyamkumbula u-Ncamashe no Xuba. Nokuba, u-Ncamashe lowo ke, wafa egqobokile. Kusemhlotshe ni ukuba u-Makapela waye welile ekulwini leminyaka eko ezweni nge 1910.

Ukusuka kwa Mankazana bafudukela Ncanarha ngase Mnyameni paya. Lonke ke elixesha u-Noyi uhhlala ku Pingelo, into ka Jubu, yasema Jwareni; kuba lemizi yama Kwayi nama Jwafa yayimi kunye igcinene ngangokuba ama Kwayi la ayebizwa ngobu Jwarha oko.

U-Noyi lo wayemfazi mnye wazala u-Makapela lo inkulu. Uti xa abalisayo:—

“Ewe ndiyamazi u-Ntsikana, umfo ka Gaba, wakwa Qanqolo, kwa Nyembezana, ema Cirheni. Waye ngu-Ngqika wenene, ihomba lenene; ebelifanelwa yimi-nweb’alo yenkunzi zodwa izingw’ezi, ingubo ashumayel’ ambete yona ke leyo umnt’omkulu. Ngunyana ka Gaba owatwetyulwa ngu-Tixo, ngo-Moya Wake omandla makulu. Oku kwenzeka ngexesha lika Ngqika no Ndlambe, abafu baka Mlawu, umkuluwa ku Rarabe. Kwenzeka inkulu eyinkosi eveleleyo kwa Xosa kuxa ingu Ngqika.

“U-Ntsikana wasiseka kwa Mankazana isikolo sake; watsho ngentw’enkulu kunene, awatabatela apo ubawo u-Noyi ukugqoboka.

“Okona kumazi kwam u-Ntsikana ndimazi kakulu xa asentshumayelweni yake, namatiletile obenzeleleli; kuba ngumfo obengemprofeti njekodwa, nomfundisi; bekusemhlotshe ni ebantwini naserementeni ukuba ukwa ngumenzeleleli pakati kwabo no Tixo wabo. Bekulula oku kubantu abangama Xosa abebeqele amatola namagogo. U-Ntsikana lo ubenefute elikulu lokwenza abamlandelayo babuve ubukulu nokuba kufupi kuka Tixo kubo; ashumaye le lomfo ngo-Tixo atsho bave

boysisakale ukuti kanti bebesona u-Tixo nangezizono kuhleliwenje! Enkonzweni xa ashumayelayo uhleli ngasezantsi, ngasemnyango; indlu izele tu ngabantu, amadoda nabafazi. Umnumzana utsho ngomnweb'ake wenkunzi zezingwe, lengub'inkulu iwugquma kakuhle umzimba womniniwo, ogcinwe ukungake uvele kuy'apa. Intshayelelo enkonzweni ibiqala nge Culo:—'Ulengub' Enkulw'esiyambata tina' le idla ngokutiwa 'Ngulo Tixo mkulu ngosezulwini,' kulemihla. Uyakuti akungena kulomhobe lomfo, kutiwe-*te* ukuhlala endlwini apa ngabakédamele Izwi lika Tixo; iti yakuma-mkela indlu, angene ashumayele lento imhlileyo, itiyene ne sono, abacázele uboni babo entlalweni yabo yemihla ngemihla, esalata izinto ezikubo azitiyileyo u-Tixo.

“Woshumayela umfo ka Gaba kude kupunyelwe pandle ngokuxinana kuba kuze nowapi ukuza kupulapula 'lento,' atsho balile abantu inyembezi ziqukuqele njengomsinga zipuma kwabahleli entla endlwini zibete ziwunqumle umbundu weziko. Yab'ilixesha ebesingafunwa kade isono nenyala ema-Xoseni; abebesiti ababanjwe ekufexezeni babulawe ngokuxónywa emtini badliwe zincúka bejing'apo, londoda nalomfazi. Lomfo ushumayela ngo Krestu esiti—'Guqukani, guqukani nonke ezonweni. Emxela u-Nyana ka Tixo okupela kwa-ke ku-Yise, u-Ngub'enkulu, u-Hlati lenyaniso, u-Nqaba, ne-Liwa lenyaniso. Ibe ngu-Nyana ka-Tixo ke lowo. Wod'ati.

“Imvan' encinane ngu Mesiyasi:”

“Unyawo zinamanxeb' okubetelwa.”

“Uzandla zinamanxeb' okubetelwa

“Eyahlatywa nge-ntshuntshe ecaleni.”

“U-Ntsikana ubemcáza umntu ongu Dafeti amenze oyena nozala wamakolwa; ekwada kwati ekundilekeni kweligama ngobuko balo, kwako indoda etiywe nge gama elingu Dafeti, iliqaba lom-Xosa pofu, kwa Mankazana paya. Igama lika Adam, nelika Dafeti, nelika Mesiyasi, Imvana ka Tixo, aqala ngo Ntsikana

ukuviwa lomini; koko ke ate ukuqaviseka acace, kwakuxa kude kwafika abafundisi abamhlope bokuqala nalencwadi yabo ye Baibile, Ilizwi lika Tixo; efike nayo yakubalisa okwayo ngo Adam, nendalo ka Tixo; ngamanya nge ango Dafeti kwano Mesiya ozayo. Kodwa makuhlale kusazeka kona ukuti umprofeti u-Ntsikana, njengom-Xosa kwasema-nyangeni, nomntu ongena-mfundo konkena, u-Tixo wamvelisa kowabo ngalondlela Yake yabamfiliba naluqiza oko; yazakuba semhlotsheni kodwa kulamaxesha sinawo, kwa yona.

“Ekushumayeleni kuka Ntsikana yangena lento ebantwini bakowabo, nakubeni bengatanga bukuqu, nanjengokuba naye wayebayaleza ukuba balamkele; kangangokuba kuqale u-Ngqika kanye ekulamkeleni, esiti oka Mlawu:—‘Ukuze iqondakale lento makuqale kungenene mna lo kuyo.’ Wadungudeli swa ngamapakati ake ngokuzinamatelisa kule nkonde ndini yobubu-Xosa; walahlekana nendlela awayeyityilelwe u-Ngqika ngu-Moya ka-Tixo. Ezipakatini kona kwafezuka kanobom, nangokuba lento iqutywa ngumntan’ ompakati u-Gaba, ekwanguye naye ngokwake. Lomfo ke ubaxelela futi ukuti lento Izwi lika Tixo asiyo yamagezana namagezazana. Sikumbula o-Noyi (Balfour) Matshya, Mbi, Nquka (itoliki) Kobe, Dukwana, Xelewa, Xuba, Ncamashe, Rwexwana, Tamo, Ngqokweni, Tyakatya, Hogu, Mangindi, Koti, Festile, namany’ amabusa asema-Xoseni, amagam’awo asingewafeze, azinikela enkonzweni ka-Tixo. Indili iye yema ngesikolo sake sase Gwali, apo ama-Jwarha akwa Soga aqala kona ukukokela elizwini lika-Tixo eqalelwe ngu Sutu umfaz’ omkulu ka-Soga, nozala u-Nongobo no-Festile nabanye. Wapuma eku tyambukeni kwekondo lika Ntsikana nomfundisi wokuqala kwabantsundu, umfi u-Tiyo Soga, ngexesha lomfundisi wokuqala u-Rev. Wm. Chalmers; kuba naba bafundisi bokuqala bagalela kulomsebenzi sewusekwe ngumtanjiswa nomnyulwa ka-Gaba.

“Abanye kulempi yabigqobo ke koka-Gaba, yapehlelelwa ngaba fundisi bokuqala abamhlope yaqokozwa namhla kulenyaniso bayingeneyo. Abesiti ke umntu

ekupehlelelweni anikwe igama elitsha, elona wobizwa ngalo ebu Kristwini, njengoko u-Noyi watiywa elokuba ngu Balfour. Laba lisiko elitsha ke eli nakuti singene lendlela intsha, asalazi; kub' amagam' etu besingahleli siwabonanto pofu. Kumhla yangena ebantwini ingqequesho yebongo; ati umntu eseliqaba azigcinele igama kula mahle namhlanje, awozitandela ukuz'atiywe ngalo akuba eguqukile.

“Makungaze kulibaleke ukuba ngenene nenyano le tyarike yase Rabe yasekwa ngu-Ntsikana kowabo ema-Xoseni; abafundisi abamhlope basema-Xoseni bona bafika ngokupulusha imihlwa kwesi siseko som-Xosa ema-Xoseni; nabo-ke sebehambisa ngemfundo, nengqoboko yasema-Ngesini ekunye nenkanyiselo nengqequesho yeminyaka. Lahlala kwa ukususela kulomaxa igama lomhlambi ka Kristu kuleremente, ne Bandla lika Tixo lasema Xoseni ozibiza nini nanini, ngelokuba wona uyirementente ka Ntsikana. Atete eseti umutu—‘Ndagqoboka ngo-Ntsikana mna;’ umhlaumbi ati ‘Ndaliva kwango Ntsikana,’ ‘kwase Gwali.’ Lamagama ke akalibaleki :—asahleli nanamhla. Isiprofeto sika Ntsikana.

“Akahlalanga entshumayelweni apa yodwa yokuguqul' abantu, waxela nezinye izinto ezohlala zihlale zibonakale—ezalata zingeko—kusemnyameni; namhla kulemihla yetu sizibona ngamehlo; siqine sisiti—Wayetshilo umporofeti u-Ntsikana. Wakankanya intlang' ezisezayo esalata. Empumalanga nase Ntshonalanga. Waqala ngabelungu wati—‘Kuza uhlanga olunwele zingcaka zifana nobulembu bombona; luza lupete into ezimbini, iqosha elingenamlomo (imali) zeningalamkeli; eyesibini le bayakuza batété ngayo, eli Lizwi lika Tixo,—zenilamkele. Ngqika! ukuba akulamkelanga, elilizwe liyakuzala zindlela zenqwelo, nendlwan' ezimhlotshana. Ukuba nilamkele iqosha eli, niyakupambana unyana noyise, umfazi nendoda, intombi nonina. Zeningaze nalwa noluhlanga, nilahlekiswe ngu Nxele lo, oluhlanga luzizigitshimi zo-Tixo opilileyo. Niyakuké nitiwe nyishi nibe' mangweni mnye, pakati kwe-Nciba nom-Bashe, nama-Mfengu; ekoti-ke kulapo kuvele nto ingu Sifubasibanzi ininqande inibuyisele kwakwi Ntaba ka Ndoda.’

"2. 'Luyeza oluny' uhlanga, lovela ngapa, uhlanga olundlebe zifana nengqoto zesikumba. Loqala ngokuba ngaba konzi kuni emva koko lojika lufun' ukunihluta ubuntu benu. 'Zeke nilulumkele, ningatatinto yalo, nosala nelishwa. Lohlala luhlale lube lubuyele kwalapo luvele kona. Elilizwe lisaya kuzala zindlela zenqwelo, lityiwe yimihlambi yegusha, lizale nazintango zengcingo, nendlwana ezimhlotshana ziyakulizaza lipela. Elilizwi lika Tixo liyakuma; loda lishunyayelwe nangabenzala kanzala yenu nokuba anisaliteni nina. Usaya kulaulwa lilo lomhlaba; nakubona nani. Nani aba niyakupinda niwel' Inciba, nibe pakati kwe Nciba nom-Bashe, baqale abantwana benu babe zintshaba zenu; nabafazi benu bangavani nani, intshaba zenu zibe ngabendlu zenu. Ngalomihla niyakuqala ningene kulamahlazo niwoyikayo namhlanje; ngeloxa uhlanga luyakusuka pezu kohlanga. Zenibe yimbumba yamanyama, kobe kuvelento ininqande nibuyele kwakula Ntaba ka-Ndoda.'

"Saba njalo-ke ukuquba kwaso isiteto sesi profeto sale ndoda. Senditshilo ukuti ubekwangu menzeleleli.

"Ndamqonda, ndingu Makapela nje, mhla ngentsabo esinga "e-Tambo" kubalekwa impi ngexesha lo-Ngqika no Ndlambe. Saba ngalalisa apa sahlahla etyolweni tina makwenkwe ngomteto ka-Ntsikana sibete sigabule isanda; sisindinde; sibeyintw' entle; sizenzela indawo yetyarike. Sotsho de sicwangcise namatye ezitulo zamatye amana ukukwelaniswa, ingenele apo ke inkonzo yetyarike. Kwanjalo kulo lonke ke uhambo lwetu. Asaze sahlukane nendawo engumnquba ka Dalidali wetu. Qonda kenawe lomsebenzi sendiwusebenza ngezi zandla zam, mna Makapela; andisaxelelwa nabawo. Sendizibonela ngala mehlw' am, ndingumntu, ndinengqondo.

"Pambi kokumka kwake elizweni u-Ntsikana wayolela esapilile wenza umkombe wake wokuncwatywa emana elinganisela ukuz'alunge kuwo, ungowomti womhlunguti. Lomsebenzi ke uqutywe ngu Noyi beno Matshaya, abona bongameli. Oku kwenzeka kwa Mankazana, e-Twatwa apo ancwatyelwe kona. Ute ngaminazan'itile kokuman'elinganiselwa kweli ncwaba, nalo-

mkombe wake bemfakile wavakal'esiti, ngokuqúla, 'Selani niselela' kuba ebekwa lincoko. Ute u-Noyi nanko umfundisi esiti 'Masiselele.' U-Matshaya upendule ngeliti: Nakanye! Ingani nelawu lentaba lide liti cwa-ka pambi kokuba kuselelwe!, Bamkupa kuba ebesahleli. Kanti ke kuyakuti ngabusukwazana butile, ekuzeni kokusa apume umpefumlo umporofeti. Ehlake! Isililo esalilwa kwa Mankazana nase Gwali, izikolo zalomporofeti, asinakulibaleka ezindlebeni zam ndingu Makapela nje; nditeta mna nanamhl'oku! Yinto eyabeta kwanga sekukála namawa, kwana mahlati la, la! Wancwátywa ngu Noyi no-Matshaya ngenkonzo ezuke kunene. Umkombe wake wafakwa ubotshwe nge ntambo zenkomo ungabetelwe ngazikonkwane ezi senza ngazo tina.

"Walala kobandayo lomini umfo odume kunene ka Gaba, kanye xa ayilentanga imadoda. Ngalomaxesha umntu ebesahlala ixesha. Ukufa kuka Ntsikana kwaba mayelana neminyaka emitatu emva kwemfazwe yama-Lindi (1818). Kwakusekuvelwa e-Tambo. Kwalinywa umnyaka wempuku nowokwaluka kuka Tshona beno Xayimpi, kwanoka Tyali Ngqika; oko-ke kukuti yayingu mnyaka we 1821 umhlaumbi 1822.

"Ndihleli ndilukumbula uhambo lwentsabo esinga e-Tambo mhla saya kunyatela e-Tshokotshela, e-Lukuko, e-Nyarha, Emtontsi, nanko; saya kutinta ngezontaba zom Tomboti sino Ntsikana; oti apo kulaliswe kona asiyolele sitat'amazenjana sihlahle etyolweni ibala, siligece kutitu sibeke namaty' okuhlala ibe yityarike ke leyo, anqulele intsikelelo u-Ntsikana ngenkonzo yembédesho,

"Ewe, u-Ntsikana walitumela ilizwi lika Tixo—alamkeleyo, lamngena—ngezitunywa ku-Hintsa, kuba Tembu kwa Ngubencúka nakwa Gqunukwebe. Kukuze u-Hintsa alinine ngokuti: 'Lifanel'ama-Mfengu la!' Noko ke alizange licáswe emhlotsheni noko lingamkelwanga ngantliziyo. Lafumaneka ukuba liyabutshitshisa ubuntu nobu kosi babo; pofu lixelwa ukuba lento iyavakala itetwayo ukuba iyinyaniso.

"Lipel'apɪ ke ibali lokwazi kwam mna, MAKAPELA BALFOUR, ngomfi u-Ntsikana Gaba um-porofeti wodumo ewasema-Xoseni. Naxa afileyo yena u-Ntsikana usateta nemisebenzi yake ke ilandelana naye."

III.—NGU JACOB MNXUMA NOYI.

U-JACOB MNXUMA NOYI uti:—“Ndazalwa nyakana wangena esutwini u-Mtirafa ka Dyan Tshatshu, emveni kwemfazwe ka Hintsa, e Dikeni, ngonyaka wokuqala ukumiwa e-Dikeni kusukwa e-Ncera. Ndizalwa ngu Robert Noyi, um-Kwayi ozeke intombi ka Ntshanga u-Mpondo kwa Ntinde. Ndingunyana wesixenxe ku Noyi. Ukuqala kwam ukubona izinto ndaqala ngemfazwe ye Zembe. Ndiyi nkwenkwana elandela lamakwenkwana alusa amatole. Ubawo ubehlala kwa Mankazana, ndizelwe seleyi remente ka Ntsikana. Ubawo waguquka ebehambele ku Dyan Tshatshu ku-Sihota, kunye no Matshaya owayemi kwa Gaga. Waza ubawo bahamba no Matshaya ukuya ku Ntsikana pesheya kwe Ncwénxa kwa Nontlutu, ukuya kuhlala no Ntsikana kuba eqale wagqoboka waza watyilelwa ngu Tixo. Elibali ndiza kulibála libali endalixelelwa ngu bawo umntu obegqoboke pantsi ko Ntsikana. Apo ndihlala kona ndihlala e-Lovedale Station, kwisiqingata sase Dikeni.

“ZIKULU! Lembali ndayityelwa ngu-bawo, umntu wokuqala owaguqakayo emva ko Ntsikana, waza wamana ukuhamba naye, wazo wapatiswa i-Remente yake akufa u-Ntsikana.

“U-Ntsikana unyana ka Gaba, isikulu ema-Citeni, kuqala wayengum-Ndlambe. Isikulu ebesebekwe njenge nkosi, Ingubo yake ibisenziwa komkulu ngofele lwengwe. Umfo obesiteti, iciko, enesitunzi kakulu, kuba ubenga-gezi, engatandi ukwenza into embi kwa nokuyibona. Ihomba. Umfo obeti xa alala pezu kwengubo yake ayibinqe ngentl’ apa. Kwa nekútshu lake elincinane lokwalusa inkomo zake ibilelengwe—kuba ngeloxesha amane ne ebezalusela inkomo zawo.

“U-Ntsikana lo waye bafazi babini, omkulu yayingu Nontsonta, unina ka-Kobe intombi ka-Ntondo. Owasekunene yayingu Xobo unina ka Dukwana, intombi ka Nqwede yasema Jwareni, eyazala intomb ezimbini u-Ntobela no Lenge. U-Ntsikana lo wayehlala e-Gqora. Waye batanda kakulu abafazi bake. Kwati ngamhla utile kwako umdudo. Sanxiba isikulu ukulungiselela umsito,



*Sarili, Head of Gcaleka Clans and Paramount Chief
of Ama-Xosa*

zapambana izidanga kuhomba. Lomfoubelicikolengoma engumhlabei, ngapezu koko ebeyindudi. Namhla ute' akufuna ukunyuka (ukuxina) akwalunga nto, wapelelwa zizimbo, akaziva enguye. Wenziwa kukungenwa ngu-Moya Oyingcwele, wamngena kakulu entliziyweni. Woyiswa kakulu, kwaye lento ukumqala kwayo akayazanga, wada ke waya ebona ukuba ide iti lento anayo itete naye (Andicani kamnandi nokuba yateta naye kwangalomini-na.) Lento yamana ukuteta imxelela izinto ngezinto. Watyilelwa nendumiso nentshumayelo ezi. Yakuba imhlile "Lento" waya ku Ndlambe kwase kuqaleni, ukuya kumtyela ngetamsanqa alitunyiweyo kuye. Kwaye ke ngelixesha kuko itola u-Nxele, elalimana liteta lisiti :

Ama-Ngqika ayakuba zimbovane ukuba ake ahlala ku Ngqika.' Wati makabuliswe njenge nkosi.

"U-Nxele esiti ezizinto azitetayo uzitunywa ngu 'Tayi' (isi-tixo esasibonwa ngu Nxele). Akufika u-Ntsikana U Ndlambe ute: 'Kawenze kuhle ukuteta Ntsikana, sisa pulapula lento itetwa ugu Nxele.' Wati u-Ntsikana. 'Ukuba akulamkeli elitamsanqa ndiza kulisa ku Ngqika;' ukuze u-Ntsikana azokuba kwa Nontlutu pesheya kwe Ncwenxa. Kulento imhlileyo ufike watyilelwa amaculo amabini, washumayela Ilizwi lika Tixo, wadumisa ngalamaculo mabini. Lemizi ibihlalelene naye ifike yalitam-bela Ilizwi. Ute u-Ntsikana akayivumela imbola ukuba mayiqatywe. ayaqatywa.

"Wanduluka u-Ntsikana akunganeliswa ngu-Ndlambe waya ku Nontlutu, waya kulishumayela naku Ngqika; no Ngqika ubesiya kuye, wade walitobela Ilizwi lika Tixo. Ate amapakati akalitanda Izwi lika Tixo, ateta ukuti azakumlahla, aye kubusa kwezinye inkosi. Wasese lahla u-Ngqika nalontwana ebenayo. U-Ntsikana wati 'lento' imxelela ukuba into ezimbi, ezingalungileyo, nemikwa encolileyo, aziyeke. Watyilelwa eliculo lodumo liti: "Ulo-Tixo omkulu," awati liteta ukuba okolwayo wofumana usindiso lompefumlo. Ke ngengqoboko yake wati umfazi wake u-Xobo wamlahla ngokuya ebetyilelwe ukuba intombi ka Nqwede ayingomkake.

Kwintyilelo yake ebugqobokeni ufike washumayela, pakati kwezinye izinto: 'Ukuba anilamkeli Ilizwi lika Tixo niyakwenza ukuba umhlaba wenu ube lixóba, ziti izizwe zinyuke ngani. Nina ma-Xosa ezontshinga zenu ziyakududa pesheya, kwe-Nciba. Kulapo niyakuké nibe nexesha kona.'

"U-Ntsikana wabafundisa abantu ukutandaza nokudumisa u-Tixo. Amaxesha ake ibilela ngokuhlwa kwakugqitywa ukutyiwa, nakusasa ngoms' obomvu. Ngezinto awaye ziteta u-Ntsikana abanye babesiti lomntu upambene, abanye uyatwasa, abanye pofu bembona ukuba akana nto anayo abakolwa.

"Kwesizukulwana sangoku kuko abati—Kuba profiti bakudala umprofiti ubesiti akugqiba ukuxela intyilelo zakwa Tixo ati—'utsho u-Yehova u-Tixo wemikosi!' waka watshona u-Ntsikana? Impendulo yam: Akazange atsho, kuba nenkolo emntwini ayiteti ngandlela nye. Yayisipiwo awayesipiwe ngendlela u-Tixo awayiqo-ndayo.

"U-Ntsikana uyokufela e-Twátwá. Wati pambi koku-aba afe waxela ukuba uzakufa, waza wahamba no bawo, no-Matshaya, Qalaga, Hogu, no Ncamashe, ekangela indawo amaze ayokuncwátywa kuyo akufa.

"U-Ncamashe waya kugawula umhlunguti wokwenza umkombe; uwuxozele kwasendle. Lembiwa incwába wati makwenziwe igumbi ecaleni, ize afakwe kulo. Kumbiwa nje umana ukuzilinganisela engena epuma. Ute u-Matshaya akubona ukuba u-Ntsikana akapilile wati mabamgoduse. Ute akufika ekaya wabúbá. Kuzilwe ngenkomo.

"Ute ukufa kwake—'Zeniti nakusuka apa niye e-Gwali, apo Ilizwi lika Tixo liyakwabelwa kona. Nibe yimbumba yamanyama.' Ahamba ke lomadoda akahlukana, ade asike azakufika e-Gwali. Inkoliso yalomadoda yabúbela e-Gwali. Afika esandul' ukufika u-Buluneli e-Gwali, eno-Mjamba Nquka, no Hanise Nquka, nabanye abangena magama njengo Nquka. I-Remente le ka Ntsikana yayipetwe ngubawo no Matshaya, yiyo eyaya kushumayela ku Ngqika akuba efile u-Ntsikana. Le

Remente yaka indlu apo inkosi iyakufikela kona nama-kosikazi ayo. Uncwatywe ngengubo yake enkulu yokulala."

IV.—UMNOMBO WAMA NTSIKANA.

U-REV. TIYO BURNSIDE SOGA uti ;—Nangu umnombo ke wendlu yakulo Ntsikana :

	Upuma ku Qanqolo		
	Ntswentswe		
	Mhlandla		
	Tana		
	GABA		
Runqa (Inkulu)	Ngetu	Vellem	NTSIKANA
Nqebeya	Mda	Nyosi	Kobe
Maxuku	Folom	James Roberts	Dukwana
	KOBE		†Ntobela
†Nomali Makaka	WILLIAM	Feni Seteni	Mpini †Lenge
	William	Jessie	†Dwala
	Falteni	Ntsikana	
		DUKWANA	ALICK
	Burnet	Francie	Vulangengqele
	Jessie	Alick	John
	Runqa	Daniel	Elizabeth
	Nkungu	John	Irvine
	Don	†Mary	Francie
	Mzimasa	Thomas	Douglas
	&c	Stephen	Adelaide
			Philpina

U-NTOBELA intombi enkulu ka Ntsikana, ezalwa ngum-Jwarakazi, yendela ku Matshikwe, Umkwayi, ozala abafundisi ababini abangu Ndongo no Petwell.

U-LENGE, eyesibini, yendela ku Mazim, um-Ntinde, Engu-DWALA yendela ku Mhalla, inkosi yama Ndlambe. Inkosi u-Kondile Nathaniel, ngumtshana ema-Cirhene. U-NOMALI, eyamazibulo ku Kobe, yendela kumfi u-Matayo Dungela wasema-Bambeni omi kwa Ntselamanzi, e-Dikeni.

Engu MARY Dukwana yayendele kumfi u-Nkohla, umfo ka-Falati, wasema Mpingeni, e-Sidutyini, Saint Marks.

(ISIPELO)

